

YIMRE MI JOONYO

- 1.1 Mi joonyo he jawmam Ta'aa'a Ceniiđo,
1.2 Kedjoowo hedjammi he fii jaaloyiđo,
1.3 He'am ngam mi yenwake sey Allah mawđo,
1.4 Kadin waawi yewtirgo yam ni yo bawđo,
1.5 Daga Allah Laamiđo tan waawi koomi.

- 2.1 Mi joonyo he burnaado tagle Cubaado,
2.2 Mi silmini dow maako ngam o Cađaado,
2.3 He njumla tageefooji fu Cubtinaado,
2.4 He Aaloo he Sahbo be maako he nadđo,
2.5 He nder diina yaa ki zamaa kanko liimi.

- 3.1 Mi noddiimo kanko he woyrugo gimđi,
3.2 He laamiđo Julbe he Waanjugu gondđi,
3.3 Mi fewnira yonki he bernde ga binndi,
3.4 He harsundu jillundu illa ga fuđđi,
3.5 Fa metteenga Sheyyuujo non maslaniimi.

- 4.1 He yewnugo seedugo yidde he bowral,
4.2 He hoolaare baadeego sirri he narral,
4.3 He nanreego dokkal he jnagingo anndal,
4.4 Ko duudi he don godđi faa nyannde darngal,
4.5 Mi waawaa hetoygo đi shim mbolwoyanmi.

- 5.1 Musidđabe hannde đalee yam mi ooloo,
5.2 Mi hoota he Allah Ceniiđo mi mooloo,
5.3 Mi woynande haa faa mi fukkoo mi tallo,
5.4 He yurmeende am ngam mi hattake Bello,
5.5 Nganam Jawmiraawo yidam mobđoyanmi.